

Նախաբան

Սույն տեղեկագրի նպատակը Հայաստանի Հանրապետությունում պարենային ապահովության և աղքատության վերաբերյալ ամբողջական ու համապարփակ վիճակագրական տեղեկատվության ներկայացումն է:

Համաձայն 1996թ. Պարենի համաշխարհային գազաթափողվի ընդունած Պարենի համաշխարհային ապահովության և գործողությունների պլանի հռոմյան հռչակագրի՝ ***պարենային ապահովությունը առկա է, երբ մարդիկ ունեն ֆիզիկական, սոցիալական և տնտեսական մատչելիություն՝ իրենց կարիքներին և նախասիրություններին համապատասխան ակտիվ և առողջ կյանք վարելու համար բավարար քանակությամբ անվտանգ և սննդարար պարենամթերքին:*** Եվ հակառակը, ***պարենային անապահովությունն առկա է, երբ մարդկանց ազատ մատչելի չեն աճի, զարգացման, ինչպես նաև ակտիվ ու առողջ կյանք վարելու համար բավարար քանակությամբ անվտանգ և սննդարար պարենամթերքը:***

Պարենային անապահովությունը կարող է պայմանավորված լինել պարենամթերքի բացակայությամբ, բնակչության անբավարար գնողունակությամբ և այլնով, որոնք հանդիսանում են նաև տնային տնտեսություններում պարենամթերքի անբավարար օգտագործման (թերսնում) հիմնական պատճառները: Պարենային անապահովությունը կարող է լինել քրոնիկ, սեզոնային կամ ժամանակավոր:

Պարենային ապահովության և անապահովության սահմանումները կարևոր են, քանի որ պարենով ապահովվածության վերլուծության անցկացման հիմնական նպատակը հանդիսանում է ոչ այնքան համապատասխան (աղելվատ) սնվող մարդկանց որոշումը, այլ ավելի շատ բացահայտումը՝ թե ***ուվքեր, որ տնային տնտեսությունները և բնակչության որ խմբերը չեն ստանում բավարար քանակությամբ սնունդ և ինչ պատճառներով:***

Վերոնշյալ հարցերի պատասխանները հնարավորություն կտան ռազմավարություն մշակողներին գնահատել պարենային ապահովության իրավիճակը հանրապետությունում, ինչպես նաև մշակել միջոցառումներ իրավիճակի բարելավման ուղղությամբ: Մասնավորապես՝ վերջինս իր արտացոլումն է գտել «Աղքատության հաղթահարման ռազմավարական ծրագրում» (ՀՀ կառավարության 08.08.2003թ., թիվ 994-Ն որոշում), որի նպատակն է կրճատել աղքատությունը հանրապետությունում, ինչը ենթադրում է նաև պարենային ապահովության իրավիճակի բարելավում:

Տեղեկագրում պարենային անապահովության հիմնախնդիրները ներկայացված են հետևյալ կտրվածքով.

- ***սոցիալ-տնտեսական միջավայր***, ինչը բնութագրում է պարենի առակայության, մատչելիության և օգտագործման (յուրացվելիության) վիճակը,

- ***գներ և գների ինդեքսներ***, ինչը բնորոշում է պարենամթերքի սպառողական գների ու ինդեքսների հատվածով տնային տնտեսությունների գնողունակությունը, իսկ գյուղատնտեսական արտադրության միջոցների գների մասով՝ արտադրության խթանումը,

- ***պարենի առկայություն***, ինչը բնորոշում է պարենի ֆիզիկական առկայությունը երկրում, անկախ այն բանից թե դրանք ստացվել են արտադրության, պահուստների փոփոխության կամ արտահանման/ներմուծման ու մարդասիրական օգնության միջոցով: Պարենի առկայության վրա ազդող հիմնական գործոններ են գները, արտադրության և առևտրի խթանումը, արտադրական ենթակառուցվածքն ու բնակլիմայական պայմանները,

-պարենի մատչելիություն, ինչը բնորոշում է պարենային ապահովության և աղքատության փոխկապակցվածությունը, մասնավորապես՝ տնային տնտեսությունների և դրանց անդամների մոտ բավարար քանակությամբ ռեսուրսների առկայությունը, օգտագործվող պարենամթերքի կառուցվածքի համապատասխանությունը լիարժեք սնուցման պահանջներին և այլն: Պարենի մատչելիության վրա ներազդող գործոններից է նաև տնային տնտեսությունների տեղակայվածությունը և հասանելիությունը շուկաներին,

-պարենի օգտագործումը (յուրացվելիությունը), ինչը բնորոշում է կենսաբանական և սոցիալական պայմաններին համապատասխան սննդի օգտագործումը: